

REGIONAL NEWS

HEADLINES:-

1. MNF party chuan vawiin khan kumin inthlanpui lo awm tura Assembly bial 40-a an candidate-turte an puang.
2. Mizoram puma tun thla ni 1-a kum tling chinte chhinchhiahna Electoral Roll vawiina tarchhhuahah Mizoramah vote nei mi nuai 8 sing 5 sang 1895 an awm.
3. Sawrkar laipui chuan Unlawful Activities (Prevention) Act tlawhchhanin National Liberation Front of Tripura (NLFT), All Tripura Tiger Force (ATTF) leh an zawmpui pawlte chu helpawlah a puang.
4. Sikkima tuilian chuan district hrang hrangah chhiatna a thlen.

<><><>

MNF PARTY ANNOUNCES CANDIDATE

MNF party chuan vawiin khan kumin inthlanpui lo awm tura Assembly bial 40-a an candidate-turte an puang a, hemi rual hian kumin inthlanpui lo awm tura an Campaign beihpui an thlak tan nghal a ni.

Chief Minister leh MNF President Pu Zoramthanga chu bial ngai Aizawl East I ah a ding dawn a, Deputy Chief Minister leh Senior Vice President Pu Tawnluia pawh Tuichangah a dingin Rajya Sabha MP Pu K. Vanlalvena chu Aizawl South 1 ah a ding dawn a, MNF candidate ah hian hmeichhe 2 an awm dawn a, Pi B. Vanlalawmpuii chu Aizawl East 2 ah a ding dawn a, West Tuipuah Prova Chakma a ding dawn a ni.

Vawiina candidate hming puan zingah MNF MLA neih sa 28 zingah Home Minister Pu Lalchamliana, Speaker Pu Lalrinliana Sailo leh Siaha bialtu MLA Dr K. Beichhua te chu MNF ticket in an ding tawh dawnlo a, Pu Lalchamliana hi a chawlh tawh dawn avangin a aiawh ah Lalremruata Chhangte chu Hrangturzo bialah a ding dawn a, Dr K. Beichhua hi MNF atanga ban niin BJP a zawm dawn thung a, Siaha bialah hian HC Lalmalsawma Zasai chu MNF candidate ani dawn a, candidate zinga hming lang lo Assembly Speaker Pu Lalrinliana Sailo bial Chalfilh ah chuan MNF ticket in Pu K. Lalhmangaiha a ding dawn a ni.

MNF MLA 28 an neih zinga ding tawhlo tur 3 tello hian MLA ni lai 25 te chu an ding leh vek dawn a, bial ngaia dinglo tur zingah P&E Minister leh Tawi bialtu ni lai Pu R. Lalzirliana chu Aizawl North-1 bialah a ding dawn a, Tawi bialah hian a aiawh turin AMC Mayor ni lai Pu Lalrinenga Sailo ruat a ni a, hei bakah hian Sports Minister leh Aizawl East 2 bialtu Pu Robert Romawia Royte chu Hachhek bialah a ding dawn a, East 2 ah hian a MNF chuan AMC Executive Councillor nilai B. Lalawmpuii chu an ruat thung a, abak zawng MLA 23 te chu an bial ngai ah vek an ding leh dawn a ni.

Nimin lawka MNF zawm thar Pu KT Rokhaw chuan kum 2018-a Congress ticket-a thlan tlin a nihna Palak bialah MNF candidate a ni dawn a, tunhnaia MNF atanga ZPM zawm tum zeta MNF-a awm zui ta Pu Rashik Mohan Chakma chu Tuichawng bialah MNF ticket in a ding dawn a ni.

Vawiin khan MNF chuan kumin kum tawp inthlan lo awm tura campaign bul an tan nghal a, Party President MNF Pu Zoramthanga chuan Pathian leh mipuite zarah sawrkarna an chang leh ngei dawn a ti a, MNF in candidate tha tak an nei thei chu a lawm thu sawiin party dangin candidate nih an inchuh laiin MNF chu mawi takin an inkian thin a ti a, Nomination committee ten uluk taka an thlan chhuah a ni a ti.

Pu Zoramthanga chuan tun hmaa an elpui ber thin Congress chu an dinhmun a hniam ve tawh hle a, mipuiten beiseina an nei tawhlo a ni a ti a. ZPM chu an khingpui lian ber tur anni tih sawiin an tan Bial harsa tam tak a awm a ti a, bial 10 velah tlin lohna tur chiang sa an nei tih sawiin tlin an beiseina bial a tlem bik hle a ti a, MNF chu an sawrkar laiin harsatna tam tak tawh mahse an sawrkar leh ngei a beisei tih a sawi bawh.

Pu Zoramthanga chuan Manipur, Myanmar leh Bangladesh atanga zo hnahtlak te chuan MNF sawrkar leh ngei se an duh a ti a, zo hnahtlak hmun hrang hranga awm ten MNF sawrkar hnuaiah an thlamuang a ti a ni.

<><><>

GOVERNOR

Ni thum chung awh Grand Gandhi Jayanti Exhibition Raj Bhavan a buatsaih chu vawiin khan khar a ni a, a kharna inkhawmah Governor Dr Hari Babu Kambhampati an Exhibition hlawhtling taka neih a nih theihna tura thawktute chungah lawmthu a sawi.

Governor chuan he Exhibition hian kut hnathawh leh an thilsiam te hlutsak inzirtirna kawngah awmzia a neih a beisei tih a sawi a. He Exhibition a rawn tel, thil zuartute leh exhibition rawn hlutsaktute chungah lawmthu a sawi a ni. Governor chuan he hunpui buatsaih a nih theihna tura tanpuina sum rawn thawh tu Ministry of Textiles, Government of India leh a huaihawttu Commerce & Industries Department chungah lawmthu a sawi bawh.

Exhibition hmang hian Central Government Scheme hrang hrang, PM Vishwakarma Yojana leh a dangte chu mipui nawlpuiin an hriat phah ngei a beisei thu a sawi a. Heng central sawrkar hnuaia scheme tha tak tak te hi uar zawka inhrilh a, inkawhmuh a ngai a ni a ti.

Commerce & Industries Director Pi Florence Zotluangpui chuan khawchhe karah exhibition chu a hlawhtling hle tih a sawi a. Nikhatna leh vawiin chawhnu inkara thil hralh chhuah zawng zawng atangin cheng nuai 30 bawr anih thu a sawi a. Sum hlawm tam zawk hi Handloom & Handicrafts atanga hmuh niin Ei chawp thil leh eitur dahthat theih te hralhna atang pawhin cheng tam tak hmuh a ni, a ti.

<><><>

FINAL E ROLL

Mizoram pumah tun thla ni 1-a kum tling chinte chhinchhiahna Special Summary Revision of Photo Electoral Rolls, 2023 neih a ni a, vawiin khan Final Roll tarchhhuah niin Mizoramah vote nei mi nuai 8 sing 5 sang 1895 an awm a ni.

Final Electoral Roll(ah hian mipa voter aia hmeichhe voter an tam zawk a, hmeichhe voter hi sing 2 sang 5956- in zan tam zawk a, Hmeichhe voter zawng zawng nuaih 4, sing 3 sang 8925 an awm a, mipa vote nei nuaih 4 sing 1 sang 2969 an awm thung a, Kum 2018-a state assembly inthlanpui neiha electoral roll hman tawh nen khaikhin chuan vote nei zat hi sing 8 sang 3714-in an pung a ni.

He electoral roll hi member 40 awmna state Assembly inthlanpui neih tur atan hman a ni dawn tih Election Department hotute chuan an sawi a, tlangzarh hnua vote nei thar te erawh final publication hnua pawh ziah luh theih anni a ti bawh.

Assembly bial 12 awmna Aizawl District ah chuan Voter nuai 2 sing 8 sang 6807 awmin mipa nuaih 1 sing 3 sang 4249 leh hmeichhia nuaih 1

sing 5 sang 2558 an ni a, mipa aia hmeichhia an tamna chu 18,309 a ni.

Lunglei ah chuan voter nuai 1 za sawmthum paruk awmin mipa sing 4 sang 9644 an awm a, hmeichhia voter sing 50491 an awm a ni.

Siaha ah chuan voter sing 4 sang 4489 awmin Champhai ah chuan voter sing 5 sang 7180 an awm a, mipa sing 2 sang 7880 awmin hmeichhia sing 2 sang 9300 an awm bawk a ni.

Kolasib ah chuan voter sing 6 leh sang 3462 an awm a, hmeichhia sing 3 sang 2859 awmin mipa sing 30603 an awm a ni.

Serchhip ah chuan voter sing 5 sang 4152 an awm a, mipa sing 2 sang 6265 leh hmeichhia sing 2 sang 7887 an awm a, Lawngtlai ah chuan voter sing 9 sang 1439 awmin hmeichhia sing 4 sang 5754 an awm a, mipa sing 4 sang 5685 an awm thung a ni.

Mamit ah chuan voter sing 6 sang 4787 an awm a, hmeichhia sing 3 sang 2064 awmin mipa sing 3 sang 2723 an awm bawk.

Tun dinhmunah Mizoramah Service Voters Mipa 4884 leh Hmeichhia 89 awmin a vaiin 4973 an awm mek a, Mizoram pumah Polling Station 1276 a awm mek a ni.

Election Department hotute sawi danin special summary revision neih chhungin Bru mi leh sa Tripura state a in beng bel nghet tawh mi 6239 te chu Mizoram electoral roll atangin paih anni a ti a, heti hian Bru mi leh sa paih zawng zawng chu mi sing 1 sang 1997 anni tih an sawi bawk.

<><><>

RUIHHLO DO RALLY

Social Welfare Minister Pu Lalrinawma'n ruihhlo do kawnga sawrkar, tlawmngai pawl leh kohhran inpekna te fakin mipuiten thahnemngai taka ruihhlo do kawngah thlawp tlat turin a sawm.

Vawiin khan Working Committee on Ruihhlo Do buatsaihin Aizawlah Ruihhlo Do Kawng Zawhpui neih a ni a, Pu Lalrinawma chuan Ruihhlo Do Kawng Zawhpui thalai tam tak an tel thei leh ruihhlo do kawnga hmalaknain thlawpna tha tak a dawng chu ropui a tih thu sawiin, hemi tihlawhtling tura pen chhuak zawng zawngte fakawm a tih thu a sawi a. Ruihhloin a run mek karah Sawrkarin theihtawp a chhuah a, State, District leh Village level thlenga awmze nei zawka hmalak a nih theih nan ruahmanna siam mek zel a nih thu a sawi a; mipuite chu ram leh hnam chhanna tur a ni tih hriaa a hlawhtlin theih nana tanpuitu leh tawiawmtu nih tum theuh turin a sawm a ni.

Pu Lalrinawma chuan nunna hlu tak chhan nan ruihhlo do let a tul thu sawiin Kalkhawmte chu mi ai baka nawm tumna thlahlel lo tur leh an nawm theih dan tur bera Pathianin a siam dan leh hemi mila ruahmanna a siamte zah thiam turin a chah a. Mipuite chu ruihhlo do hna chu Sawrkar Department chanah dah bik mai lova, mi zawng zawng mawhphurhna a ni tih hriaa theihtawp chhuaha tanrualpuiah a sawm nghal bawk.

Ruihhlo Do Kawng Zawhpui hi thuang hniha neih niin, Millenium Centre kawt leh Sikulpuikawn atangin a tawpa kharna hun hmanna Raj Bhavan Hmar lam Gate pana neih a ni.

<><><>

TRIPURA

Sawrkar laipui chuan Unlawful Activities (Prevention) Act tlawhchhanin National Liberation Front of Tripura (NLFT), All Tripura Tiger Force (ATTF) leh an zawmpui pawlte chu helpawlah a puang. Union Home Ministry chuan heng pawlte hi kum nga chung an chetvelna zawng zawng khap a ni ang a ti a. NLFT leh ATTF te hi ram thuneihna leh zalenna ti derthawng thei zawnga an che tih sawiin sawrkar laipui chuan dan kalha pawl indin niin a puang a ni.

<><><>

SIKKIM FLOOD

Sikkima tuilian district hrang hrangah chhiatna a thleng. Thudawn danin ruahsur nasa avangin Teesta lui leh Mangan District-a Lhonak Lake te chu a lian nasa hle a. State Disaster Management Authority te sawidanin Pakyong district-ah sipai 23 chu chin hriatlohin an bo a, Bardangah sipai pakhat chu tuilian atanga chhanchhuah a ni baw. Lirthei tam tak tuiin a chim a. CM PS Tamang chuan chhiatna thlenna hmun Singtam a thleng tawh a ni. Mangan, Gangtok, Pakyong leh Namchi district-ah tuilian avang hian chenna in leh vantlang hmun tam tak a chhia a. Inkalpawhna hmun tam tak ah a chhia a ni.

<><><>

CHINA ASIAN GAMES

China khawpui Hangzhou-a Asian Games neih mekah India chuan medal 74 la tawhin heng zingah hian gold 16, Silver 27 leh bronze 31 an tel a. A pumpuiah palina dinhmun a hauh mek a ni. Tun tum Asian Games hi India a la chet that ber tum a ni a. Tukin khan India thal kah thiam pahnih Jyoti Surekha Vennam leh Ojas Deotale te chuan Compound Mixed Team ah gold medal an la a. Boxing-ah Lovlina Borgohain chuan hmeichhia kg 75 ah silver medal a la bawk a ni.

<><><>